



REPUBLIKA E SHQIPËRISË

KUVENDI

Komisioni Ad Hoc për Verifikimin e Kandidaturave

PROCESVERBAL

Tiranë, më 31.05.2017, ora 09:00

Drejton mbledhjen:

Ulsi Manja – kryetar i Komisionit

Rendi i ditës:

1. Miratimi i procesverbalit të mbledhjes së datës 30.05.2017.
2. Votimi i listës së kandidatëve, hartuar sipas pikës 4 të nenit 8 të ligjit nr. 84/2016 “Për rivlerësimin kalimtar të gjyqtarëve dhe prokurorëve në Republikën e Shqipërisë”, që do t’u përcillet komisioneve *ad hoc* përzgjedhëse.

Marrin pjesë:

Ulsi Manja, Flamur Noka, Vasilika Hysi, Oerd Bylykbashi, Luan Rama, Luçiano Boçi.

HAPET MBLEDHJA

Ulsi Manja – Fillojmë mbledhjen e radhës së Komisionit *ad hoc* për Verifikimin e Kandidatëve që do të bëjnë rivlerësimin kalimtar të gjyqtarëve dhe prokurorëve, pra për panelet e vetingut.

Sot në rendin e ditës kemi miratimin e procesverbalit të mbledhjes së djeshme. Kush është dakord me procesverbalin?

Dakord.

Si pikë të dytë të rendit të ditës kemi votimin e listës së kandidatëve, i hartuar sipas pikës 4 të nenit 8 të ligjit nr. 84/2016 “Për rivlerësimin kalimtar të gjyqtarëve dhe prokurorëve në Republikën e Shqipërisë”, që do t’u përcillet komisioneve *ad hoc* përzgjedhëse.

Përpara se të bëj të ditur procedurën e votimit, që do të ndjekë komisioni, dua të sjell në vëmendje se kjo mbledhje e komisionit bëhet pa praninë e medieve, mbledhja do të regjistrohet për efekte të rekordeve parlamentare dhe në përfundim të mbledhjes së komisionit do të ftohen mediet për të bërë të ditur vendimmarrjen e këtij komisioni.

Tani, në bazë të ligjit dhe të vendimit nr. 40/2017 “Për procedurat parlamentare për funksionimin e komisioneve *ad hoc* dhe realizimin e procesit të votimit”, sipas ligjit nr. 84/2016 “Për rivlerësimin kalimtar të gjyqtarëve dhe prokurorëve në Republikën e Shqipërisë” në nenin 8 janë përcaktuar procedurat, pra procesi i votimit që do të ndjekë ky komision.

Për efekt rekordesh, unë do t’ju lexoj nenin 8 “Procesi i votimit”, pra procedurën e votimit që do të ndjekë komisioni. Në pikën 1 thuhet: “Komisioni *ad hoc*, pas zhvillimit të seancës dëgjimore me kandidatët, me propozimin e një anëtari të tij, mund të kalojë një kandidat nga lista e kandidatëve që nuk plotësojnë kriteret formale, te lista e kandidatëve që i plotësojnë kriteret formale me të paktën katër vota.

2. Pas përfundimit të votimit të emrave të kandidatëve të listës, sipas pikës 1 të këtij neni, komisioni *ad hoc*, me propozimin e një anëtari të tij, mund të kalojë një kandidat nga lista e kandidatëve të rekomanduar nga Operacioni Ndërkombëtar i Monitorimit, te lista e kandidatëve për votim me të paktën pesë vota.

3. Listës së kandidatëve për votim, që do t’u përcillet komisioneve *ad hoc* përzgjedhëse, i bashkëngjitet, në rast se ka, edhe lista e votimit sipas pikave 1 dhe 2 të këtij neni.

4. Kandidatët, të cilët janë në listën e kandidatëve që plotësojnë kriteret formale, përfshirë, në rast se ka, edhe ata që janë votuar sipas pikës 1 të këtij neni, por që nuk janë në listën e rekomandimeve të Operacionit Ndërkombëtar të Monitorimit, kalojnë automatikisht në listën për votim.

5. Lista për votim përmban kandidatët që plotësojnë kriteret formale, sipas pikës 4 të këtij neni, së bashku me kandidatët e votuar nga komisioni, sipas rregullave të përcaktuara në pikën 2 të këtij neni. Në rast se nuk ka votim, sipas pikës 1 dhe 2 të këtij neni, atëherë do të mbetet si listë e vetme, që kalon pa votim nga Komisioni për Verifikimin e Kandidatëve. Lista e kandidatëve që plotësojnë kriteret formale, përveç atyre që nuk janë të rekomanduar nga Operacioni Ndërkombëtar i Monitorimit është e vetmja që u përcillet komisioneve *ad hoc* për votim.

6. Brenda dhjetë ditëve nga krijimi i tij, komisioni *ad hoc* u përcjell listën e hartuar, sipas pikës 5 të këtij neni, komisioneve *ad hoc* përzgjedhëse, së bashku me dosjet personale të kandidatëve. Dy listat e tjera nuk dërgohen për votim.” Kjo është procedura e përcaktuar në nenin 8 dhe, sipas kësaj procedure, secili nga kolegët ka përpara listën e kandidatëve që nuk plotësojnë kriteret formale dhe nuk kanë rekomandime nga ONM-ja (lista që do t’i nënshtrohet procesit të votimit me katër vota), listën e kandidatëve që plotësojnë kriteret dhe kanë rekomandime nga ONM-ja (që do t’i nënshtrohen votimit me pesë vota) dhe listën për votim që do t’i përcillet komisionit *ad hoc*.”

Tani...

(Ndërhyrje pa mikrofon.)

Po, zoti Bylykbashi.

Oerd Bylykbashi – Faleminderit, zoti kryetar!

Kam një propozim për procedurë.

Në vijim të diskutimeve të bëra në dy seancat e mëparshme për sa i përket mënyrës sesi duhet të veprojë ky komision, në raport me detyrën që ka, pra verifikimin e kandidatëve, identifikimin e kandidatëve që plotësojnë kriteret dhe vetëm ata, në mënyrë që të hartohet lista e cila përfshin vetëm kandidatët që plotësojnë kriteret dhe kur kjo është e nevojshme, nëse Avokati i Popullit, në shkelje të së drejtës të kandidatëve, të cilët i plotësojnë kriteret, i ka përjashtuar dhe ne me katër vota i përfshijmë, si dhe kur ne nuk bindemi për rekomandimin negativ të ONM-së, për të krijuar këtë listë, është në detyrën tonë që të verifikojmë çdo kandidat, i cili nuk plotëson kriteret, edhe pse mund të jetë përfshirë në listën A.

Pra, në vijim të asaj që kemi diskutuar, siç e thashë edhe më lart, propozimi im është që ne të vendosim tani me votim nëse do të marrim në shqyrtim dhe të votojmë për mospërfshirjen në listën A të atyre që Avokati i Popullit i ka përfshirë dhe nuk kanë rekomandim negativ nga ONM-ja.

Kështu që unë do të doja që juve, si kryetar, ta hidhni në votim këtë propozim timin, për të vendosur më pas si do të procedojmë. Pjesa tjetër është e qartë.

Faleminderit!

Ulsi Manja – Faleminderit, zoti Bylykbashi!

Pra, ju propozoni që neni 8...

Oerd Bylykbashi – Pra, në zbatim të nenit 8, ne do ta hartojmë listën përfundimtare, duke shqyrtuar edhe kandidatët që janë kualifikuar në listën A, por në gjykimin tonë, rast pas rasti, nuk kanë kriteret formale. Për rrjedhojë, ne do t'i përjashtojmë me katër vota, sipas rregullave standarde të këtij ligji.

Ulsi Manja – Dakord, dakord, jam i qartë.

Secili nga kandidatët mund të kalojë për votim me propozim të një anëtarit të komisionit. Pra, është me propozime dhe me nominime konkrete. Tani ju po propozoni për të gjithë listën në bllok?

Oerd Bylykbashi – Jo, por propozoj që rast pas rasti, nominalisht, nga lista “a” ne mund të heqim ata kandidatë, të cilët nuk i plotësojnë kriteret formale (nëse ka të tillë nga shqyrtimi). Unë propozoj që këtë rregull procedure ta miratojmë me vendim dhe më pas, të operojmë. Më pas vendos komisioni.

Ulsi Manja – Pra ju propozoni që lista e kandidatëve, që i plotësojnë kriteret formale dhe nuk kanë rekomandim nga ONM-ja, t'i nënshtrohen votimit me 4 vota?

Oerd Bylykbashi – Jo lista, por individë të caktuar nga ajo listë.

Ulsi Manja – Urdhëroni, zonja Hysi!

Vasilika Hysi – Faleminderit, zoti kryetar!

Në fakt unë do të doja t'i referohesha nenit 9, të ligjit nr. 84 të vitit 2016, i cili i njeh komisionit pas zhvillimit të seancës dëgjimore, vetëm dy lloje votimesh.

E para, në paragrafin 3, shkronja “a” e nenit 8 thuhet: “Komisioni ad hoc, pas zhvillimit të një seance dëgjimore me kandidatët, vendos: a- të kalojë një kandidat nga lista e kandidatëve që nuk plotësojnë kriteret formale të lista e kandidatëve që plotësojnë kriteret formale, me të paktën katër vota;”

Në këtë paragraf nuk thuhet që komisioni mund të heqë një kandidat, i cili nuk i plotëson kriteret formale, nga lista e kandidatëve që plotësojnë kriteret formale.

Gjithashtu, ne na njihet e drejta për një votim të dytë nga lista e kandidatëve të rekomanduar negativisht nga ONM-ja, ne mund të kalojmë të lista e kandidatëve për votim, një kandidat me 5 vota.

Pra, këto janë vetëm këto dy lloje votimi. Kjo duket qartë në paragrafin 3, shkronja “a” dhe shkronja “b” të nenit 8. Këtë e rikonfirmon edhe paragrafi 4 i po këtij neni, ku thuhet: “Lista për votim e kandidatëve që ne përcjellim përmban kandidatët, të cilët plotësojnë kriteret

formale (pra lista që na ka ardhur nga Avokati i Popullit), përveç atyre që nuk kanë rekomandim negativ nga Operacioni Ndërkombëtar i Monitorimit dhe që nuk janë miratuar me vendim të këtij komisioni *ad hoc*, sipas pikës 3 të këtij neni. Për këtë arsye ne nuk mund t'i kalojmë dhe nuk mund t'i përfshijmë.

Gjithashtu, nuk mund të përfshijmë edhe ata, të cilët ne nuk i kemi miratuar me një vendim me 4 vota. Kjo është shumë e qartë.

Për diskutimin që bëme edhe dje, nëse jemi votues apo përcjellës, unë mendoj se kjo del qartë edhe te vendimi i Kuvendit, që ne e përcjellim listën me 67 kandidatë dhe nëse kemi 4 vota ose 5 vota, i shtojmë emra kësaj liste.

Nëse nuk kemi, shkojnë vetëm 67 emrat. Kjo është theksuar në nenin 8 të Rregullores ku thuhet: “Pas seancave dëgjimore, nëse ndonjë nga anëtarët e komisionit kërkon që një kandidat të kalojë nga lista, që nuk i plotëson kriteret formale, atëherë ne e hedhim në votim. Nëse asnjë nga ne nuk e kërkon, nuk kemi pse t'i hedhim në votim.

Po kështu edhe për paragrafin 2 të nenit 8. Pas përfundimit të listës me kandidatët që nuk i plotësojnë kriteret formale, ne do të kalojmë te lista me kandidatët për të cilët ka një rekomandim negativ.

Ulsi Manja – Cili është propozimi?

Vasilika Hysi – Unë them që nëse ndonjëri nga ne do të dojë ndonjë emër nga lista, do të fillohet me listën e kandidatëve, të cilët mund të kalojnë me 4 vota. Vetëm nëse ndonjëri nga ne e kërkon. Nëse nuk e kërkon, është në rregull.

Ulsi Manja – Dakord.

Faleminderit!

Oerd Bylykbashi – Zonja Hysi,

Ndoshta s'u kuptuam, por propozimi im është i thjeshtë: te lista “a”, pra për ata që janë të kualifikuar nga Avokati i Popullit dhe nga ONM-ja, pra që nuk kanë rekomandim negativ nga ONM-ja, aty, nëse gjejmë emra që nuk përputhen me kriteret, t'i përjashtojmë, pra jo t'i përfshijmë, por e kundërta. Ky propozim është për procedurë, në mënyrë që të përcaktojmë rregullin. Nëse komisioni bie dakord, operojmë. Këtë ta bëjmë me votë.

Ulsi Manja – Zoti Bylykbashi,

Është një mekanizëm që unë nuk mund ta hedh këtë propozim në votim për një arsye shumë të thjeshtë, sepse lista me 67 emra u përcillet automatikisht dy komisioneve *ad hoc*.

Riformulojeni edhe një herë propozimin, zoti Bylykbashi!

Oerd Bylykbashi – Propozimi im është që komisioni të marrë vendim me 4 vota për të përjashtuar nga lista “a”, ata kandidatë (sipas rastit), të cilët edhe pse janë përfshirë në listë,

nuk i plotësojnë kriteret formale. Për shembull kur janë përfshirë edhe pse u mungon vjetërsia, edhe pse nuk kanë dokumentacionin e provuar, edhe pse kanë konflikt interesi. Unë gjykoj që kështu duhet të vendosë komisioni. Ta hedhim në votim dhe më pas, të ecim përpara.

Ulsi Manja – Hedhim në votim propozimin e zotit Bylykbashi!

Kush është dakord me të? 3 vota.

Kundër? 3 vota.

Me 3 vota pro dhe 3 vota kundër, nuk miratohet.

Vazhdojmë sipas procedurës të përcaktuar në nenin 8 të vendimit.

Fillojmë votimin!

(Ndërhyrje pa mikrofon)

Urdhëroni, zoti Rama!

Luan Rama – Meqenëse për shkak të absurdit që ka ligji, sepse unë jam dakord në parim me logjikën që parashtroi zoti Bylykbashi, por meqenëse ne nuk na e jep ligji të drejtën që nga lista e Avokatit të Popullit, për kandidatët për të cilët nuk ka rekomandim nga ONM-ja, të heqim ndonjë emër, por duke iu referuar seancave dëgjimore ku u referua që atje ka njerëz, të cilët nuk i plotësojnë kriteret ligjore për shkak të paaftësisë apo të subjektivizmit me të cilin është shqyrtuar ajo listë nga Avokati i Popullit dhe nga ONM-ja, rezulton që për të njëjtën arsye emra të tjerë (në vlerësimin tim), me më shumë integritet sesa emrat që janë kaluar në listë, nuk janë përfshirë aty për të njëjtin shkak. Kam parasysh 5-6 emra, që rezultojnë me konflikt interesi. Dikush ka motrën, burrin apo vëllain që punon në sistemin e drejtësisë, gjë që vetë ligji e ka parashikuar se si evitohet për shkak të pranimit të zëvendësuesve në rastin konkret.

Megjithatë, unë kam këtë propozim: Për shkak të precedentit, meqenëse në listë ne kemi emra që formalisht kanë të njëjtin problem, unë propozoj që të gjashtë emrat, që janë vetëm për shkak të konfliktit të interesit, ne t'i përfshijmë te lista e parë, gjithmonë nëse kjo është e mundur me konsensusin e të gjithë anëtarëve të komisionit. Ligji parashikon propozim emër për emër dhe votim me 5 vota, por nëse ne jemi më shumë se kaq dhe biem dakord që këta pesë emra të kalojnë te lista e parë, unë e quaj të arsyeshme dhe logjike. Pra, kam parasysh, zonjën Katro, zonjën Peka, zonjën Meçaj, zonjën Avdiu dhe zonjën Halilaj.

(Ndërhyrje pa mikrofon)

Sokol Lamaj ishte për...

Për të thënë të drejtën, unë do ta quaja kandidaturë të vlefshme Sokolin, por është çështje e deklaramit të pasurisë. Pasi ika që këtu, bëra një verifikim personal dhe më rezultoi

që ai është i martuar me një femër nga një familje tiranase më shumë prona. Ai tha nuk kam prona...

(Ndërhyrje pa mikrofon)

Nejse, nuk dua ta komentoj.

Për shkak të performancës së tij, unë do ta quaja kandidaturë të vlefshme. Gjithsesi, kam këtë propozim: Të biem dakord për këtë gjë ose të mos i prekim listat me rekomandime.

Ulsi Manja – Faleminderit, zoti Rama!

Në fakt, duke u bashkuar me atë që ju thatë, që edhe në listën që do t'u përcillet komisioneve *ad hoc*, pas seancave dëgjimore dhe në komision, kishte kandidatë që deklaruan që ishin në konflikt interesi, por për shkak se gjenden në atë listë, unë i sugjeroj komisionit që në raportin që do t'ju çojmë dy komisioneve përzgjedhëse, të evidentojmë faktin që tre kandidatë, të cilët janë përfshirë te lista dhe që nuk kanë rekomandime nga ONM-ja, kanë deklaruar me vetëpërgjegjësi në seancë dëgjimore përpara komisionit që janë në konflikt interesi.

(Ndërhyrje pa mikrofon)

Që kanë marrëdhënie me subjekte të rivlerësimit, gjyqtar dhe prokuror, për t'ua bërë...

(Ndërhyrje pa mikrofon)

Ata nuk pranuan që janë në konflikt interesi, por që kanë lidhje me subjektet e rivlerësimit. Dy komisionet e tjera përzgjedhëse ta kenë në konsideratë këtë fakt, pavarësisht se nuk është evidentuar në listën që do t'i përcillet Kuvendit.

Lidhur me atë që ju propozoni, unë i propozoj komisionit të vazhdojmë me procedurën e votimit sipas nenit 8, me 4 vota. Pra, fillimisht me listën...

Nëse te lista e kandidatëve do të ketë kandidatë që nuk plotësojnë kriteret formale dhe nuk kanë rekomandime nga ONM-ja, pra nëse ka propozime konkrete nga kjo listë, dhe pasi të mbarojmë këtë procedurë votimi nga lista me katër vota, do të kalojmë sipas procedurës te lista tjetër ku kërkohen pesë vota.

Gjithsesi, propozimi im konkret, për të qenë deri në fund në frymën e asaj që do të vendosim në komision, unë propozoj që lista me pesë vota, pra lista që ka marrë rekomandim negativ nga ONM-ja për cilindo shkak apo arsye që ne i dëgjuam në seancë dëgjimore, të mos preket. Gjithsesi, nëse nga kolegët ka propozime konkrete edhe për këtë listë, i hedhim në votë.

Luan Rama – Kam një koment pas asaj që thatë ju, zoti kryetar.

Së pari, nëse do t'i bëjmë një relacion komisioneve të tjera duke thënë që iksi dhe ipsiloni kanë marrëdhënie me subjekte të ligjit e të tjera, në vlerësimin tim ky është diskriminim. Sepse themi: "Këta janë në kundërshtim me ligjin, por ne po jua sjellim". Në

qoftë se janë në kundërshtim me ligjin, të mos i çojmë ose të mos bëjmë komente, sepse nuk na e jep ligji këtë të drejtë. Ligji thotë që komisioni vetëm përcjell listën.

Ne jemi një pjesë në atë komision, por le ta gjykojnë ata si do të veprojnë. Në aspektin praktik, ligji nuk na jep...

Ulsi Manja – Jam dakord, sepse edhe atje kjo kategori kandidatësh do t'i nënshtrohet seancës dëgjimore të detyrueshme, kështu që, i evidentojnë edhe vetë.

Luan Rama – Ligji nuk na e jep të drejtën të bëjmë komente.

Personalisht, të paktën ne të katërt, sepse zoti Boçi nuk ishte dje, e dimë shumë mirë dhe e kuptojmë, jemi përball ligjit që na e ka krijuar këtë problem, që zonja Meçaj për shembull, nuk mund të krahasohet në asnjë gjë me Fatmira Lulin, fjala vjen. Kjo ka motrën apo burrin, por edhe ajo ka burrin. Ajo është atje, kurse kjo nuk është.

Pra, në kuptimin që kush i shërben më mirë trupës që do të zgjidhet nesër, unë padyshim do të zgjidhja zonjën Meçaj, të cilën e kam parë për herë të parë dje, apo cilindo nga ata që ishin atje. Ndërkohë, pavarësisht vlerësimit që ka bërë ONM-ja, unë i qëndroj idesë që si zonja Rama, ashtu edhe zonja Beçaj, janë në konflikt interesi, pavarësisht se nuk janë... Në çfarë kuptimi? Ajo ka qenë prokurore e Përgjithshme.

Konkretisht, dje pas mbledhjes, më ka takuar një prokuror që ka një njeriun e vetë në listë. Më tha, në qoftë se ajo do të vijë në komision, ajo më ka shkarkuar mua, më ka hequr nga puna pa të drejtë dhe më ka rikthyer ky tjetri. Në qoftë se ajo do të jetë në komision, do të mbajë të njëjtin qëndrim ndaj atij.

Kanë qenë anëtare të KLD-së si ajo, ashtu edhe zonja Beçaj. Kanë marrë vendime për të larguar apo për të afruar.

Pra, koncepti i konfliktit të interesit, në kuptimin e ligjit, është më i dukshëm këtu sesa tek njëra që ka vëllain apo motrën. Për shembull, **Katrin** Katro ka motrën,.

Pra, ose do të biem dakord me konsensus ose të mos i prekim fare listat e rekomandimeve.

Ulsi Manja – Po, zoti Bylykbashi.

Oerd Bylykbashi – Kam edhe diçka tjetër. Ne u ndeshëm këtu me të paktën dy raste kandidatësh, të cilët kanë eksperiencë shumë të mirë në profesion, që janë skualifikuar për shkak se gjatë karrierës së tyre, edhe për periudha të shkurtra, mund të kenë qenë këshilltarë ligjorë në stafe të larta, madje edhe institucionesh të pavarura. Unë besoj se Shqipëria nuk e ka luksin të ketë numra shumë të mëdhenj profesionistësh me eksperiencë të pandërprerë (ne dimë shumë mirë se çfarë ndodh në Shqipëri), për rrjedhojë t'i skartojnë kaq lehtë këta persona vetëm se një apo dy muaj apo qoftë edhe një vit apo 10 vjet më parë kanë pasur në karrierën e tyre

funksionin e një këshilltari apo punojnë sot e kësaj dite këshilltarë në institucione të pavarura, të cilat janë me ligj të pavarura. Kështu që besoj se do të ishte një shpërdorim i jashtëzakonshëm i këtyre pak resurseve që ne po kërkojmë për të bërë komisionet e vetingut. Kam parasysh këtu rastin e zotit Hasani, rastin e zotit Kazanxhi, mund të ketë edhe raste të tjera. Më duket se ishte një rast që ishte dikush i cili kishte punuar vetëm 1 muaj në një nga organet si këshilltar, pra këta përjashtohen. Kjo është diçka që nuk ka lidhje as me realitetin dhe kriteri ligjor, interpretimi, vlen po aq sa për rastin e këtyre që janë në këtë lloj konflikti interesi dhe unë jam dakord me atë që u tha nga parafolësi. Pra, ligji konkret ka instrumente për ta shmangur konfliktin e interesit rast pas rasti dhe në disa raste të tjera konflikti i interesit, edhe pse nuk është sipas germës së ligjit, është absolutisht i dukshëm.

Ulsi Manja – Faleminderit, zoti Bylykbashi!

Po, zoti Noka.

Flamur Noka – Jam tërësisht dakord me diskutimin konkret që bënë zoti Rama dhe zoti Bylykbashi, por në tërësi në parim unë vazhdoj t'i qëndroj asaj që kam thënë çdo ditë në mbledhjet e këtij komisioni. Kjo listë pretendentësh për të bërë vetignun është listë që mund të quhet turp. Do të thoni pse. Tani ne jemi duke çuar për të bërë vetingun e gjyqtarëve të Gjykatës Kushtetuese juristë peshku, juristë të kompanive të rrobaqepësisë. Po çojmë të marrin në testim gjyqtarët e Gjykatës së Lartë dhe të Gjykatës Kushtetuese juristë të cilët maksimumi në jetën e tyre kanë bërë tri gjyqe, avokatë të cilët kanë bërë tri gjyqe dhe në ato tri, dy i kanë bërë për prona dhe një për rrahje mes komshinjve. A e kuptoni se çfarë niveli është 95% e kësaj liste? Se çfarë vetingu mund të na bëjnë këta!

Po ju them një gjë: do të na kthehet kundër kjo dhe ky do të jetë turp për ne. Prandaj unë kam qenë dhe vazhdoj të jem të përzgjedhim ata emra, të cilët kanë realisht një *background* profesional. Sepse çfarë ndodh?! Në rast se në tërësinë e asaj liste të kualifikuar (nuk po flas më për të skualifikuarit) pamë dje që kishte edhe kapterë, juristë që nderohen si kapterë këtu; në rast se dje pamë njerëz të cilët pretendonin që ishin juristë, që kishin dy vjet që kishin marrë juridikun, por kishin punuar në sektor me parë dhe plotësonin kriterin e vjetërsisë në punë, këta do të lëmë të bëjnë drejtësinë?! Kjo është një faqe e zezë e reformës në drejtësi. Kjo nuk është reformë në drejtësi, por është varrosje e drejtësisë. Ndaj unë vazhdoj të këmbëngul përsëri për rastin e parë, për të cilin këmbënguli edhe kolegu Bylykbashi. Në çdo rrethanë, përpos faktit që po bëjmë një turp, ne po përbaltim edhe ata 10 apo 15 profesionistë të vërtetë që ishin në atë listë dhe po i bëjmë gjëmën drejtësisë me këtë listë.

Ulsi Manja – Faleminderit, zoti Noka!

Si rregull është një andej, një këtej.

Po, zonja Hysi, shumë shkurt, të lutem!

Vasilika Hysi – Faleminderit, zoti kryetar!

Në fakt, po e nis me çështjen e parë, me shqetësimin që ngritën këtu kolegët për cilësinë e listës. Lista përbëhet nga 67 kandidatë të mundshëm, të cilët i plotësojnë kriteret dhe nuk kanë rekomandim negativ nga ONM-ja. Pa dyshim që jo të gjithë janë të atij standardi dhe të atij niveli që ne kërkojmë. Megjithatë, janë dy komisionet e tjera *ad hoc*, të cilat kanë të drejtë të për zgjedhin, ndërsa ne duhet të bëjmë thjesht verifikimin e kriterëve të tyre.

Lidhur me çështjen e dytë të ngritur nga kolegu Rama për lidhjet e ngushta familjare, po është e vërtetë që ne gjetëm edhe tre emra të tjerë, të vetëdeklaruar nga kandidatët, të cilat nuk ishin parashtruar në listën e ONM-së. Nga ana tjetër, ne nuk mund t'i përjashtojmë ata, sepse vetëm përcjellim listën. Por pothuajse të gjithë ne jemi anëtarë edhe të njërit prej dy komisioneve të tjera dhe kjo duhet të jetë në...

Flamur Noka – Mos e presupozo vetën se je, thuaj “nuk jam” dhe ti do të marrësh vendim. Supozohet që në komisionin tjetër nuk do të jemi as unë as ti, por do të jenë të tjerë, sepse kështu nuk e bëjmë objektiv gjykimin, por jemi subjektivë në gjykim. Më fal që të ndërpreva dhe të kërkoj ndjesë se më ke akuzuar edhe si masikilist dhe është akuzë shumë e rëndë kjo që më ke bërë.

Vasilika Hysi – Pak je...

Flamur Noka – Nuk jam unë. Ka një gjë, e dashur Vasilikë, ti je një nga pedagoget më të vjetra të Fakultetit Juridik në Universitetin Shtetëror të Tiranës me një barrë eksperiencë dhe me një CV të pasur. A e kupton se çfarë do të thotë që një jurist rrobaqepësie të të marrë në pyetje ty për njohuritë e tua juridike në fushën e kushtetutshmërisë, për Kodin Civil, Kodin Penal etj? Para se të ulërij unë për këtë gjë, duhej të kishte ulëritur ti, moj zysh, se unë jam fillestar në njohuritë e mia në fushën e drejtësisë, sepse i përkasim profesionit tjetër dhe po arrij të vlerësoj dhe të tmerrohem nga ai nivel. Merre me mend, një profesionist i mirëfilltë a do të ulërijë apo jo?!

Kaq kisha. Faleminderit!

Vasilika Hysi – Zoti Noka, e thashë te pika e parë e listës. Aty ka kandidatë që i plotësojnë thjesht kriteret, por nuk plotësojnë ato çfarë kërkon neni “c” i Kushtetutës.

Flamur Noka – Edhe neni “c” kriteret ka.

Vasilika Hysi – Thuhet “duhet të jetë jurist i nivelit të lartë në administratë, të jetë pedagog, të jetë gjyqtar, prokuror e të tjerë”.

Falmur Noka – Si do t'i kalojmë këta?

Vasilika Hysi – E thamë, e mbyllëm dhe pjesërisht jam dakord me shqetësimin tuaj. Por kalova te çështja e dytë dhe për ta qartësuar, sepse ne po lëmë rekorde dhe dikush do t'i lexojë më vonë. Ne për fatin e një boshllëku që ka ligji, nuk kemi mundësi të heqim nga lista ata kandidatë që nuk plotësojnë kriteret formale, sepse ne vetëm i përcjellim.

Zoti kryetar, lidhur me shqetësimin që ngriti zoti Bylykbashi, që ka kandidatë, të cilët për një muaj kanë qenë këshilltar, ka kandidatë që për një muaj kanë qenë këshilltarë, por vetë ne në Kushtetutë kemi thënë që kandidati nuk duhet të ketë mbajtur funksione politike në administratën publike gjatë 10 vjetëve të fundit, dhe e kemi bërë në mënyrë taksative, nuk kemi thënë 1 vit, 2 vjet ose më shumë se një vit.

Flamur Noka – E kemi sqaruar, që këshilltari juridik nuk është funksion politik.

Ulsi Manja- Zonja Hysi, i kemi sqaruar dje dhe pardje këto gjëra. Unë për ekonomi kohe, sepse...

Po, zoti Boçi.

Luçiano Boçi – Jam më i riu këtu, por dua të jap edhe unë mendimin tim.

Ulsi Manja – Po, s'ka problem. Për efekt rekordesh kemi mundësi të lëmë të gjithë nga një gjurmë këtu.

Luçiano Boci – Në fakt, nuk i kam dëgjuar kandidatët, por kjo që tha Flamuri është paksa tronditëse, domethënë që ka jurist peshku, rrobaqepës, artistë, kapterë e të tjerë. Por unë e parashtroj çështjen parimisht dhe shoh që ka mendime të përbashkëta, por edhe të kundërta në lidhje me atë që quhet konflikt interesi, sepse lëviz nga lidhjet familjare te qenia këshilltar, që nuk është pozicion politik, deri te pozicione shumë të larta në sistemin e drejtësisë. Luani e tha pak a shumë qartazi, që një lidhje familjare ka një drejtim subjektiv, sepse flitet për subjektivitet, nuk flitet për konfliktin e interesit klasik, kjo konsiderohet më shumë nepotizëm sesa konflikt interesi. Të përjashtosh një kandidat, për një arsye të tillë, lidhje familjare, mua s'më duket e logjikshme, përballë atij që ka mbajtur për vite të tëra funksione në sistemin e drejtësisë, ku dihet që krijohen afilacione, kundërshti, të cilat pasqyrohen gjatë gjithë përvojës së punës së atyre që i kanë mbajtur këto pozicione. Të përjashtosh një këshilltar, që është një opSION si mendim, nuk është vendim, sepse nuk merr vendime, nuk më duket e logjikshme. Prandaj kjo të ndahet mirë. Ndoshta ne nuk e kemi kompetencë si komision, ta bëjë komisioni tjetër, por të sqarohet konflikti i interesit.

Faleminderit!

Ulsi Manja- Jam shumë dakord zoti Boçi. Faleminderit!

Vazhdojmë me listën e kandidatëve që nuk plotësojnë kriteret formale dhe nuk kanë rekomandime nga ONM-ja, pra me katër vota. A ka propozime konkrete për ndonjë nga emrat

e kësaj liste? Pra që nuk plotësojnë kriteret, por që nuk ka rekomandime nga ONM-ja. Pra, lista me 39 emra kandidatësh. A ka propozime konkrete nga anëtarët? Verifikojeni listën dhe bëni propozimet konkrete!

Keni 2 minuta kohë.

Kam një sqarim. Ato të gjashtit që ka zoti Rama, janë te lista e kandidatëve që duhet të kalojnë me 5 vota, nuk janë te kjo listë, pra janë te lista që kanë rekomandim negativ nga ONM-ja ose ajo që quhet “Lista e zezë”. Ne jemi te lista me katër vota, pra te lista jeshile, le të themi. Lista e kandidatëve që nuk plotësojnë kriteret, por që nuk kanë rekomandime negative nga ONM-ja është me 39 emra...

(Ndërhyrje pa mikrofon)

..që ju të nderuar kolegë e keni mbi tavolinë. Tani, si rregull, procedura e votimit është me propozime nominale. Ne thamë 2 minuta ose 5 minuta kohë, nëse ka, do të formalizohen propozimet për ndonjë nga emrat konkret.

Flamur Noka – Vasil Shandro është i skualifikuar me pretendimin që nuk plotëson kriteret, por në fakt, ka paraqitur dokumente, ku pretendimi është se ka 19 vjet punë. Sepse kriteri është...

Ulsi Manja – Vasil Shandri është i 37 në listë.

Flamur Noka – Ka qenë i përjashtuar, sepse nuk plotëson kriteret e vjetërsisë në punë, në fakt, ka paraqitur të gjitha informacionet dhe dokumentet e duhura që ka mbi 19 vjet punë.

(Ndërhyrje pa mikrofon.)

Në vitin '97 i është djegur i gjithë dokumentacioni, siç e dimë historinë e vitit '97 në Lushnjë, dhe, sigurisht, nuk ka pasur ku t'i gjente. Në librezën e punës në Tiranë ai rezulton se i ka të gjitha vitet e punës të firmosura dhe të vulosura, pra 19 vjet.

Ulsi Manja – Urdhëroni, zonja Hysi!

Vasilika Hysi – Në fakt, në propozimin për të shtuar me 4 vota një anëtar nga lista e kandidatëve që nuk plotësojnë kriteret dhe nuk ka rekomandim ONM-je, ne duhet të kemi parasysh nenin 6, konkretisht:

Së pari, të ketë përfunduar ciklin e dytë të studimeve universitare me diplomë master shkencor ose studimet universitare për drejtësi jashtë shtetit dhe të ketë një diplomë të njësuar.

Së dyti, çështja që diskutohet më shumë është të ketë jo më pak se 15 vjet përvojë, dhe këtu ka disa kategori: gjyqtar, prokuror, avokat, profesor i së drejtës. Këto janë të qarta. Mund të kesh 15, 16 apo 20 vjet jurist, por në qoftë se do të jesh në administratë, në shërbim civil, duhet të jesh në nivel drejtues i lartë. Pra, kanë bërë një dallim, jo çdo juristi edhe ai që është në pozicion specialisti, i njihet si kriter, sipas germës “b”, të nenit 6.

Ulsi Manja – Zonja Hysi, është një propozim konkret i zotit Noka.

Flamur Noka – O Vasilika, nuk kam thënë kot që ky zotëria (unë nuk e njoh fare) të paktën më duket krejt normal në raport me shumë të tjerë, që na vinin dhe na nderonin si kapterë, dhe ti i ke kaluar si juristë që kanë plotësuar kriteret ligjore. 99% e tyre nuk e njohin çfarë është doktatura, nuk e njohin çfarë është një master, nuk njohin asnjë gjë dhe ti i ke kaluar. Tani gjen te ky që ka 19 vjet punë. Po ta them shqip, zotëria dispononte librezën e punës, të firmosur dhe të vulosur, dokument nuk ka, sepse është djegur arshiva e Lushnjës dhe nuk ka dokumente.

Ulsi Manja – Zoti Noka, të kuptoj shumë qartë, ka një propozim konkret nga ju.

(Ndërhyrje pa mikrofon.)

Urdhëroni, zoti Rama!

Luan Rama – Ligji, përveç kriterit formal të vjetërsisë së punës, dhe të profesionit e të tjerë, e specifikon që duhet të ketë qenë në nivele të larta drejtuese në administratë, pra drejtor, drejtor i përgjithshëm e të tjerë, ose të jetë profesor, gjyqtar, prokuror e të tjerë. Pra, mund të kesh 15 vjet punë, por ke qenë jurist në ndërmarrje dhe nuk plotëson kriterin tjetër.

Flamur Noka – Po për atë juristin e peshkut dhe të rrobaqepësive, që e kishte kaluar edhe ONM-ja, edhe Avokati i Popullit.

Luan Rama – E kanë kaluar, sepse ashtu e kanë bërë listën ata.

Flamur Noka – Për këtë çfarë do të thuash ti?

Luan Rama – Unë jam kundër atyre dhe këtyre.

Flamur Noka – Ose rrëzojmë edhe ata dhe këtë, ose ke kaluar ata dhe ke lënë këtë, pra të bëjmë një standard.

Luan Rama – Praktikisht ky është i rrëzuar.

Flamur Noka – Ai është i rrëzuar, sepse nuk ka vitet e punës, jo për këto kriteret që thoni ju, sepse ka qenë drejtues, është rrëzuar, sepse nuk ka vitet e punës. Në fakt, librezën e kishte të firmosur, të vulosur, pra i kishte të gjitha, vetëm se nuk e gjente dot në arkiv, sepse arkiv është djegur në vitin '97. Pra, ai nuk është rrëzuar, sepse nuk plotëson kriteret që nuk ka qenë drejtues apo nuk ka pasur kriteret shkencore, është rrëzuar vetëm për eksperiencë pune.

Kaq është. E ka vërtetuar se vitet e punës i ka, sepse kriteret tjera i ka pasur në rregull.

Të nderuar kolegë, unë vazhdoj t'ju them se lista ishte ulëritëse. Dje kemi kaluar kandidatë që të bëjnë të vajtosh një javë rresht kur t'i shikosh dhe ju më thoni mua që një njeri me integritet normal, një njeri me formim normal, nuk po them mbi mesataren, është rrëzuar vetëm për një argument, nuk ka vitet e punës, jo për argumente të tjera. Ai i vërtetonte dje me dokument, me librezë, që e kishte librezën të firmosur dhe të vulosur nga të gjitha nga

institucionet ku ka punuar, por që në arkivin e Lushnjës nuk ekzistojnë letrat, sepse janë djegur vëlla. Janë të djegura në vitin '97.

Vasilika Hysi – Zoti Noka, ju keni shumë të drejtë, por diskutimi që po bëhet është nëse një kandidat që ka vitet e punës, si jurist, i ka si drejtues të nivelit të lartë në administratë, apo i ka thjesht jurist. Nuk mjafton t'i kesh si jurist, germa “b” këtë gjë thotë. Pra, është ajo që thoni ju, që këta persona duhet të jenë shumë të aftë profesionalisht, sepse do të vlerësojnë kryetarin e Gjykatës së Lartë dhe kryetarin e Gjykatës Kushtetuese.

Flamur Noka – Ata juristët e rrobaqepësisë i kalove ti?! Po ti i ke kaluar? Pse zbaton dy standarde? Pastaj ky zotëria nuk është rrëzuar, se nuk plotëson këtë kriterin, është rrëzuar për dy vjet punë. Në fakt, ai ka 19 vjet punë, sepse i është zhdukur eksperiencia në punë nga vitet '92 deri në '97. Tani, ai me këtë eksperiencë në punë del 19 vjet, pra është rrëzuar për dy vjet, po ta vërteton se i ka këta dy vjet, nuk është rrëzuar, pse nuk ka formim, siç thua ti, zonjë. Doni të bëni kriteret politik, kriter politik, unë nuk e njoh fare, as nuk më intereson, por është turp dy standarde. Mos zbatoni dy standarde. E rrëzojmë këtë, e rrëzojmë, e pushkatojmë, por rrëzoni dhe ata të peshkut dhe të midhjes, edhe ato të rrobaqepësisë apo ata juristët e këpucarisë, që i ke kaluar, zonjë.

Ulsi Manja – Mbaj qetësi, sepse jemi pa medie dhe është komision që po regjistrohet për efekt rekordesh. Jemi në mbledhje punë.

(Ndërhyrje pa mikrofon)

Ulsi Manja - Më fal!

Zoti Noka, të lutem, kujdes me fjalorin!

(Ndërhyrje pa mikrofon)

Luçiano Boci – Zoti kryetar, nga debati që bëri zoti Noka me zonjën Hysi unë po shikoj që qëndrimet kanë qenë të ndryshme në situata të ndryshme. Nëse flasim për kritere të unifikuara për të gjithë, atëherë hajdeni t'i zbatojmë për të gjithë! Nëse i ndryshojmë sipas emrave, atëherë kot që funksionon edhe ky komision. Duket sikur ka karakter krejtësisht formal ose politik siç e tha edhe zoti Noka. Këtu bëhet fjalë për një emër që kërkohet të kalohet nga kjo listë në një listë tjetër, sepse është bërë një gabim në mënyrën e interpretimit të vjetërsisë së tij dhe nuk hyn fare arsyeimi që tha zonja Hysi, se nuk ka punuar në administratën e lartë.

(Ndërhyrje pa mikrofon)

Flamur, para 19 vjetësh një person nuk hynte direkt në administratën e lartë. Normal, ai do të ketë ecuri në karrierë, ka filluar jurist i thjeshtë, ka punuar në Lushnjë, në Tiranë, çfarë rëndësie ka? Ai ka vërtetuar me librezën e punës dhe faktin e djegies së dokumentacioneve,

këtë e kanë vuajtur shumë institucione shqiptare të drejtësisë, të policisë, të arsimit e të tjera dhe janë marrë në konsideratë në bazë të dokumenteve autentike në raste të tjera analoge. Përderisa ky person për të cilin bëhet fjalë është përjashtuar për këtë dhe vërtetohet e kundërta, pse ne si komision të mos e kemi ndërgjegjen për ta kapërcyer në listën 67 dhe për ta bërë listën me 68? Në këtë rast unë nuk shikoj arsye as ligjore dhe as logjike.

(Ndërhyrje pa mikrofon)

Ulsi Manja- Ju lutem, për këtë diskutim që kemi, prandaj ky komision është me këtë kompozim, procedura e votimit për të shmangur çdo lloj debati ka parashikuar mekanizmin e votimit, kur nuk ka dakordësi në emra të caktuar, emrat hidhen në votim dhe nëse kandidati merr 4 vota nga kjo listë, automatikisht bëhet pjesë e listës që do t'i përcillet dy komisioneve të tjera. Këtu pati një propozim konkret nga zoti Rama që tha, se nëse nuk gjejmë dakordësi lidhur me disa emra, propozimi ishte që ne si komision t'i përcjellim listën dy komisioneve të tjera, siç e parashikon ligji. Nëse nuk gjendet dakordësia, unë për çdo emër që propozohet nga secili koleg këtu për t'u kaluar nga njëra listë te lista që do t'u përcillet dy komisioneve të tjera, jam i detyruar ta hedh në votim. Edhe për efekt rekordesh, por edhe për efekt të zbatimit të ligjit unë jam i detyruar ta hedh në votim. Nëse këtu pati një propozim nga kolegu Noka për emrin e kandidatit Vasil Shandro për t'u bërë pjesë e listës që do t'i përcillet dy komisioneve të tjera, unë nuk mund ta kaloj pa votim, nëse zoti Noka nuk e tërheq si emër, pra nëse nuk ka dakordësi unë jam i detyruar ta hedh në votim, nëse nuk e tërheq propozimin.

Po, zoti Noka.

Flamur Noka - Zoti kryetar, jam dakord me parimin, me procedurat. Zotërinj, unë kam një shqetësim: zonja kolege, deputete e dashur e jona, pse nuk i përmendi askujt dje kërkesat, t'i thoshte : “Ku i ke ti, profesor Luarimi, si doktor shkencash, studimet shkencore? Atyre juristëve të peshkut, të midhjes, të rrobaqepësisë, të këpucarisë, pse nuk ia kërkoji këto? Jo, nuk ia kërkuar askujt dje. U struk aty dhe ishte gati të bënte therore e Avokatit të Popullit, ndërsa sot na e nxjerr kokën. Vasilika, unë ta kam thënë vazhdimisht: unë dhe ti jemi militantë politikë, por jashtë kësaj godine jemi militantë, ndërsa këtu do të diskutojmë edhe si shtetarë, edhe si politikanë. Nuk mund të fle si partiak, për fle si Flamur.

Ulsi Manja - Po, zonja Hysi për procedurë.

Vasilika Hysi – Po, zoti kryetar për procedurë, këtu mund të bëhet shumë politikë, por ju lutem të fillojmë të zbatojmë nenin 8 të Rregullores, procesin e votimit. Në paragrafin e parë thuhet: “ Nëse një nga anëtarët e komisionit *ad hoc* popozon një emër anëtari, ai mund të kalojë një kandidat nga lista e kandidatëve që plotësojnë kriteret formale, te lista që nuk plotësojnë me 4 vota”. Të fillojmë me emrat konkretisht, kush ka.

Ulsi Manja – Jam shumë dakord, pasi procedura e votimit është shumë e qartë, unë e thashë edhe më parë, zoti Noka ka bërë propozim konkret, siç e ka bërë zoti Noka mund të bëjmë të gjithë kolegët.

Po, zoti Bylykbashi.

(Ndërhyrje pa mikrofon)

Oerd Bylykbashi - Atëherë nëse ne gjendemi përpara një qëndrimi *rixhit*, ju do të ktheni edhe ato nene të ligjit, të pavlefshme, pra mundësinë për të rikuperuar me 4 vota apo me 5 vota, sepse nuk doni të mbyllni 67 –tën. Nëse ju doni të bëni këtë, kjo tregon dy gjëra: jo vetëm që ju nuk pranoni logjikën bazë që unë e propozova dhe ju e rrëzuat që personat të cilët nuk i kanë kriteret, por janë te lista, duhen përjashtuar. Kjo tregon se ka një përzgjedhje selektive politike, që ka ardhur këtu nëpërmjet Avokatit të Popullit. Së dyti tregon se ju jeni shumë të kënaqur me atë 67-shen, që do të thotë se edhe katërshja, edhe pesë votat nuk ju interesojnë, janë në ligj thjesht për ta mbyllur 67-shen si të doni.

Sigurisht, kjo mund të ketë pasojë edhe te votimi i këtij komisioni, për të mbyllur listën, kjo mund të ketë pasojë edhe te komisionet e tjera.

Unë po e shtroj edhe një herë sipas logjikës së thjeshtë: kemi kandidatë të cilët, në bindjen tonë, përtej rekomandimesh negative apo kualifikimesh subjektive, janë njerëz që, eventualisht, vlejnë për t'u shtruar për zgjedhje, nuk është e thënë se do të zgjidhen.

Tani, le ta bëjmë këtë ushtrim, ta mbyllim këtë detyrë, dhe të vazhdojnë komisionet e tjera, por nëse ju doni vetëm të kaloni listën e përzgjedhur e të filtruar politikisht, që ju kanë sjellë këtu nëpërmjet Avokatit të Popullit, unë këtë e konsideroj veprim që ka *background* të pastër politik.

Ulsi Manja – Zoti Bylykbashi, vijmë te çështja konkrete dhe te ajo që parashikon ligji dhe procedura e miratuar në Kuvend për mënyrën e funksionimit të këtij komisioni. Në nenin 8 është përcaktuar shumë qartë procedura e votimit. Nominalisht, secili nga kolegët bën propozime për kandidatët e listës që kemi përpara, pra kandidatët që nuk plotësojnë kriteret dhe nuk kanë rekomandime nga ONM-ja.

(Ndërhyrje pa mikrofon)

Zoti Noka ka bërë një propozim konkret për një nga kandidatët. Tani zoti Noka thotë...

(Ndërhyrje pa mikrofon)

Të lutem, të lutem, zoti Noka, sa ta mbyll.

(Ndërhyrje pa mikrofon)

Zoti Noka, kur votuam bashkërisht Kushtetutën në mesnatën e 21 – 22 korrikut, thamë: komisionet *ad hoc* do të kenë këtë mënyrë kompozimi ligjor, në barazi, pakicë-shumicë. Tani, po të gjendet dakordësia ose mirëkuptimi për t'i kaluar, siç propozoi zoti Rama...

(Ndërhyrje pa mikrofon)

Flamur Noka – Për ju, për ju të maxhorancës, për ty e për zonjën e kasetës, kam vetëm një pyetje: a ju vjen turp që ngrini dorën dhe jeni dakord të çoni juristë rrobaqepësish, juristë peshku, juristë të këpucarisë, që të bëjnë testimin e gjyqtarëve dhe të bëjnë vetingun?

Ulsi Manja – Ta jap unë përgjigjen.

Flamur Noka – Çfarë është kjo more?

Ulsi Manja – Ta jap unë përgjigjen, zoti Noka. Nuk na vjen turp, për sa kohë ne zbatojmë Kushtetutën dhe ligjet e vendit tonë.

(Ndërhyrje pa mikrofon)

Flamur Noka – Çfarë doni të bëni ju more?

Ulsi Manja – Zoti Noka, të lutem...

(Ndërhyrje pa mikrofon)

A ka mundësi të operojmë me procedurën e votimit.

(Ndërhyrje pa mikrofon)

Mos iu refero koleges Hysi për këtë pjesë, sepse Kushtetutën e kemi votuar bashkërisht. Të lutem, mos iu refero koleges Hysi.

(Ndërhyrje pa mikrofon)

Flamur Noka – Zot na u kujtove se paska kritere, ndërsa dje që Avokati i Popullit i ka shkelur këto kritere me këmbë...

Ulsi Manja – Avokati i Popullit...

Flamur Noka – Ata kandidatë që kanë kaluar dje dhe që i kishte miratuar Avokati i Popullit, as 1% e tyre nuk kanë ato kritere, që sot i përmendi kjo zonjë.

Ulsi Manja – Të lutem...

Flamur Noka – E kuptoi, ishin turp...

(Ndërhyrje pa mikrofon)

Ulsi Manja – Zoti Noka, ju lutem, ulni tonet, sepse jemi në një mbledhje pune, në fakt. Kjo mbledhje është mbledhje pune.

Oerd Bylykbashi – Për procedurë.

Ulsi Manja – Po, zoti Bylykbashi.

Oerd Bylykbashi – Tani, unë sugjeroj që ne të mos përdorim listën prej tridhjetë e nëntë, por të përdorim listën që përdorëm ditën e parë, e cila i ka të gjithë emrat këtu, janë 109

emra, ku është shënuar edhe numri i votave që duhen për të kaluar njërin ose tjetrin. Pse e them këtë? ne mund të kemi kandidatë që janë për t'u konsideruar, sepse kanë pesë vota, dhe kemi kandidatë të cilët, me të njëjtin kriter e kanë me katër vota, pra, nuk kanë marrë rekomandim nga ONM-ja.

Supozojmë që dikush ka marrë rekomandim për të njëjtën çështje, ndërsa dikush tjetër s'e ka marrë. Nëse bëjmë ndarje, një herë me katër vota, një herë me pesë vota, mund të krijojmë vendimmarrje të ndryshme në lidhje me këtë. Për shembull, ka kandidatë që në dhjetëvjeçarin e fundit mund të kenë një periudhë të shkurtër si këshilltarë ligjorë në institucione. Njëri mund të jetë në një listë me pesë, njëri mund të jetë te lista me katër. Nëse përfshijmë atë me katër dhe lëmë atë me pesë, bëjmë gabim. Edhe në të kundërtën bëjmë gabim. Kësisoj, unë mendoj që ne të procedojmë me këtë listën këtu, përndryshe do të na krijohen vështirësi në ushtrimin e kriterëve në mënyrë të njëtrajtshme.

Ose biem dakord dhe përdorim logjikën, duke marrë vendime, ose, nëse ju e keni mbyllur shabllon dhe doni të çoni vetëm 67 emrat, që janë filtruar më parë në mënyrë të kujdesshme, na e thoni, dhe ne marrim qëndrimin tonë.

Ulsi Manja – Zoti Bylykbashi...

(Ndërhyrje pa mikrofon)

Më fal të lutem, të jap një përgjigje.

Është shumë e qartë procedura e operimit të votimit nga ky komision, e dhe në raport me ligjin nr. 84/2016, edhe me procedurat e miratuara në Kuvend. Ka dy mënyra votimi: një me katër vota e një me pesë vota. Votimit me katër vota i nënshkruhet vetëm lista që kemi përpara, pra lista me 39 kandidatë, ndërsa votimit me pesë vota i nënshtrohet lista e dytë, që ju keni mbi tavolinë. Tani, ju lutem...

Po zoti Rama.

Luan Rama – Fryma e konkretizuar në ligj...

(Ndërhyrje pa mikrofon)

O Flamur, një sekondë!

Fryma e konkretizuar në ligj për krijimin e këtyre komisioneve ka pasur dhe ka parasysht konsensusin dhe mirëkuptimin.

(Ndërhyrje pa mikrofon)

Një minutë.

Sepse, nëse ndahemi në çdo rast me votë, asnjëherë nuk bëhen katër apo pesë, që, për shkak të faktit se nuk ka vullnet, ta shohim pa krijuar barrierë formale të numrit matematik të votës, por të nisemi nga logjika e zgjidhjes së problemit dhe për ta ndihmuar procesin.

Unë gjykoj se ka mundësi për ta kapërcyer këtë barrierën e votës dhe të shkojmë tek emra që ne mund t'i pranojmë të gjashtë bashkë. Kjo është fryma me të cilën janë miratuar këto komisione, që kur është vendosur tre me tre, është thënë që të gjenden emrat që e kapërcejnë numrin tre, për shkak të vullnetit të palëve.

Flamur Noka – Zoti kryetar, ju këshilloj miqësisht, kini në konsideratë një gjë: ajo që tha zoti Rama është esenca e gjithë çështjes për të cilën ne jemi ulur këtu për të diktuar dhe për të gjetur zgjidhje. Pse? Ne jemi këtu produkt i një marrëveshjeje të madhe politike dhe në rast se jemi produkt i një marrëveshjeje politike, sigurisht, ne nuk mund të jemi kaq të ngurtë dhe me dy standarde. Ne nuk po kërkojmë këtu asnjë gjë, por ama po them se jemi dakord që këtu, në këtë listë 67-she, kishte njerëz të cilët kishim probleme dhe i ka kaluar Avokati i Popullit sikur s'kanë probleme dhe po më të njëjtat probleme, me të njëjtat kritere që i ka futur këta, ka skualifikuar njerëz të cilët ishin të ngjashëm, identikë me këta dhe u gjetën raste dje. Edhe ONM-ja kishte dy raste, të cilat i kishte gjykuar gabim dhe i vërtetuar dje këtu.

Avokati i Popullit kishte mbi dhjetë raste, minimumi, që ishin identikë dhe një pjesë i kishte kualifikuar dhe një pjesë jo.

Tani çfarë do të thotë? Çfarë jemi ne këtu? Në rast se ju keni marrë urdhër politik dhe urdhri politik kërkon që atë 67-she, 99% e të cilëve ishin nivel zhul dhe 1% e të cilëve ishin nivel politik juaj, të gjithë anëtarë të PS-së, njëra ishte ish-anëtare e KQZ-së e propozuar nga PS-ja, tjetri zëvendësministër i PS-së, tjetra prokurore e PS-së, që nuk lë vend pa e futur kryeministri juaj, tani edhe këto doni t'i quani komision vetingu? Jeni për faqe të zezë dhe për turp. Por, po ju them se do të mbani përgjegjësi, sepse çdo gjë do të bëhet publike dhe ju po bëni gjithçka për të bllokuar tashmë procesin e vetingut, sepse është nisur me konsensus, e kemi votuar ligjin e reformës në drejtësi të gjithë me konsensus, kemi arritur që kemi votuar edhe ngritjen e komisioneve tona me konsensus dhe këtu kaseta e Vasilikës bëhet shkak për të prishur konsensusin.

Ta gëzoni prishjen e konsensusit! Unë kam vetëm një detyrë, në emër të forcës politike, në emër të opozitës, t'ua bëjmë publike qytetarëve që këta e kishin deri këtu, sa të hyjmë këtu dhe të prishin procesin...

Ulsi Manja – Zoti Noka, mua më duket se urdhër politik paskeni marrë ju, ky krahu këtej, e them sinqerisht këtë.

Tani, procedura e votimit është shumë e qartë. Kur nuk ka dakordësi për emra të caktuar, hidhen në votim. Unë nuk e kuptoj ku është urdhri politik këtu, sepse ti ke bërë një propozim konkret për një emër dhe thua: o ma kaloni këtë se dua unë, ose ndryshe ne ikëm.

(Diskutime pa mikrofon)

Standardi është një dhe vetëm një. Emrin që ke propozuar e hedh në votim. Kjo është procedura për të ecur komisioni. Unë nuk e kuptoj ku është politika këtu.

Procedura është e qartë edhe në ligj, edhe në Rregulloren e Kuvendit.

(Diskutime pa mikrofon)

Zotëria dhe shumë zotërinj të tjerë kanë marrë rekomandim edhe nga ONM-ja, edhe nga Avokati i Popullit, njëri për kriteret formale, ndërsa Operacioni Ndërkombëtar i Monitorimit për kritere të tjera.

Tani standardi është ky, ndërsa për të shkelur rekomandimin e ONM-së qartësisht në Kushtetutë duhen 5 vota, për të “shkelur” rekomandimin e Avokatit të Popullit duhen 4 vota. A ka mundësi që emri që propozon secili nga kolegët t’i nënshtrohet votimi? Këtu nuk ka të bëjë politika fare. As nuk ka urdhër politik për 67 emra, as për 70 dhe as për 100...

(Diskutime pa mikrofon)

Zoti Noka i është referuar disa herë koleges Hysi. Në ka njeri që është më pak politik në këtë komision dhe në dinamikë si deputete dhe kryetare e Komisionit të Ligjeve... Të lutem shumë! Zonja Hysi është një deputete e nderuar, është kryetare e Komisionit të Ligjeve, po them se është njeriu më pak politik në këtë komision tani dhe ta akuzosh zonjën Hysi si njeri politik...

Urdhëroni, zonja Hysi!

Vasilika Hysi – Faleminderit, zoti kryetar!

Ju lutem kolegë, nuk do të doja ta merrja fjalën, por kjo është një mbledhje e rregullt komisioni dhe u nënshtrohet të gjitha rregullave sipas Rregullores së Kuvendit dhe gjithçka është e regjistruar dhe nuk do të pranoja kurrësi këtë baltosje nga kolegu.

Në radhë të parë, unë nuk vë ndonjë kasetofon se jam e zonja të flas pa kasetofon.

E dyta, po ju lexoj Rregulloren e Kuvendit.

Dhe do të kërkoja të respektojmë etikën ndaj njëri-tjetrit dhe të zbatojmë Rregulloren e Kuvendit.

Listës së kandidatëve që kanë ardhur këtu, si ata që janë në listën që plotësojnë kriteret formale, edhe ata që nuk i plotësojnë ose kanë një rekomandim negativ, ne nuk mund t’i përflasin dhe t’u vëmë etiketime që nuk na shkojnë në kulturën dhe në etikën personale, por do të thosha edhe të institucionit që ne përfaqësojmë. Nëse kemi kandidatë që duhet t’i kalojmë me 4 vota në listë, të fillojmë procesin. Nëse nuk ka, i nderuar zoti kryetar, dua të them që të respektojmë nenin 8 të Rregullores, pikën 5. Besoj se kjo nuk është kasetë, as urdhër politik, por është një vendim i miratuar me unanimitet. Lista për votim përmban kandidatët që plotësojnë kriteret formale së bashku me kandidatët e votuar. Pika 5 e nenit 8 thotë: “Në rast

se nuk ka votim sipas pikës 1, me 4 vota, ose sipas pikës 2 të këtij neni, atëherë mbetet si listë e vetme dhe kalon pa votim nga Komisioni për Verifikimin e Kandidatëve” lista që plotëson kriteret formale. Ne jemi 6 kolegë që kemi kohë bashkë në parlament dhe do të jemi së bashku, por nuk ka nevojë të bëjmë etiketime. Jemi në kushtet kur këtu në këtë komision nuk duhet të bëjmë politikë, se politizojmë të gjithë procesin. Në qoftë se nuk ka votim me 4 dhe me 5. Zoti kryetar, kalo listën dhe ajo mbetet lista e vetme që përcillet. Pra, nuk votohet.

Flamur Noka – A ishe dje këtu ti kur rezultoi që...

(Diskutime në sallë)

A ishit këtu që edhe ONM-ja për 3-4 raste identike, për 2 raste ka dhënë rekomandim negative dhe për 2 raste rekomandime pozitive. Ishin identike. Ti, zonjë, si profesioniste që je, a do të zbatosh një standard apo dy standarde? Këtë më thuaj dhe ta mbyllim.

Vasilika Hysi – Zoti Noka, kur mora fjalën pak më parë, ju thashë se po, kjo nuk është lista më e mirë e mundshme, por a kemi mundësi ne që të ribëjmë listë? Jo nuk keni mundësi.

Flamur Noka – Ndaj është votimi, zonjë, sepse...

Vasilika Hysi – Atëherë le t’i hedhim në votim.

Flamur Noka – Zonjë, ke mundësi që në rast se iks person apo ipsilon person, avokati e ka rrëzuar për të njëjtat kriteret për të cilët ka mbajtur...

Vasilika Hysi – Zoti Noka, ushtrojmë të drejtën e votës. Pse nxeheni? Ushtrojmë të drejtën e votës.

Flamur Noka – Nuk pres dyfytirësi këtu. Dyfytirësia më vret. Kaq.

Luçiano Boçi – A ka mundësi të ndërhyj në debat dhe të sqaroj disa gjëra? Shkurt, aq sa duhet. Më mirë qartë sesa shkurt. Çështja që parashtrahet është çështje zbatimi kriteresh dhe mos u kapni tek emrat, sepse në qoftë se ne flasim për një emër, emri është shembull që janë shkelur parimet dhe kriteret. Flas për rastin konkret të emrit që u përmend. Pra, nuk janë zbatuar ato kriteret që unë i dëgjova dhe nga zonja Hysi që të ketë përvojë të lartë në institucione, drejtim, doktoraturë, mastera, edhe për kandidatë të tjerë që sot janë në listë. Ne në qoftë se nuk jemi komision filtrues, atëherë i bie që jemi komision formal, por formalisht...

Flamur, të lutem!

Jo nuk mund të jemi kaq formalë. T’i rrëzojnë atje, apo t’i rregullojmë atje. Komisioni duhet të luajë rolin dhe funksionin e tij në këtë rast. Në qoftë se kjo listë paska ardhur me 67 emra nga Avokati i Popullit, mos të harrojmë që ky ka qenë tërësisht politik, tërësisht jashtë afateve kushtetuese dhe subjektiviteti në këtë rast në këtë listë është shumë i madh dhe ne këtë po e vërtetojmë. Është detyra jonë si komision që ta bëjmë. Formalisht e ka sjellë ai shabllon dhe po ai e ka bërë punën saktë. Unë kam kontestime, i kam shfaqur dhe jam para një liste të

kontestuar, të parakontestuar, sepse është një listë që ka dalë nga një institucion që ka shkelur afatet kushtetuese të ushtrimit të detyrës dhe të funksionit të tij. Kështu që është shumë e thjeshtë që ne të rregullojmë shumë gjëra aty dhe ne këtë po kërkojmë si anëtarë të opozitës në këtë komision.

Ulsi Manja – Zoti Boçi, është shumë e qartë procedura e ndjekur deri më tani nga komisioni *ad hoc*. Në këtë komision, në referencë të Kushtetutës dhe të ligjit “Për rivlerësimin kalimtar të gjyqtarëve dhe prokurorëve”, por edhe vendimit nr.40 të Kuvendit të Shqipërisë, na kanë ardhur 2 lista. Kanë ardhur “Lista A” dhe “Lista B”. Lista e kandidatëve që plotësojnë kriteret formale, ku 17 prej tyre kanë një rekomandim negativ nga ONM-ja . “Lista B” është me 109 kandidatë, ku 39 prej tyre nuk kanë një rekomandim nga ONM-ja. Ky komision i ka marrë të gjithë kandidatët në seancë dëgjimore dhe sot jemi në një proces, prandaj Kushtetuta, ligji dhe procedura e votimit është e tillë që, për të shmangur këtë natyrë të debatit që po bëhet deri më tani këtu, ka përcaktuar një mekanizëm votimi me 4 dhe me 5 vota, që do të thotë se nuk ka dakordësi. Secilin nga kandidatët që propozohet për t’iu bashkangjitur listës që do t’u përcillet dy komisioneve të tjera, unë, në bazë të nenit 8 të Rregullores, jam i detyruar ta hedh në votim. A ka mundësi emrin që propozoi zoti Noka ta hedhim në votim? Unë këtë po kërkoj.

Flamur Noka – Hidheni në votim, por ama ka një gjë. Para se të hedhësh në votim atë, do të hedhësh në votim propozimin që bëri zoti Rama. Ka bërë një propozim, në mos gabo, zoti Rama para meje.

Ulsi Manja – Cilin propozim tha zoti Rama? Zoti Rama, propozimi i konsensusit nuk ka të bëjë me procedurën dhe me ligjin. Ai ishte propozim konsensusi.

Luan Rama – Kërkova konsensus në kalimin e emrave dhe jo votim për të mos e bllokuar procesin.

Flamur Noka – A jemi dakord për atë që thotë zoti Rama?

Ulsi Manja – Nuk është propozim që mund të hidhet në votim ajo që thotë zoti Rama. Nuk më lejon Kushtetuta dhe ligji, more zotëri! Mos më kërkoni të shkel ligjin. Jam i qartë për këtë pjesë. Konsensusi nuk është pjesë e ligjit, por është pjesë e një debati tjetër.

Oerd Bylykbashi – Për procedurë e kam. Ajo që kërkon zoti Rama, ligjin, zotëri.

Që ne të biem dakord në parim që për kandidatura të së njëjtës kategori të aplikojmë të njëjtin standard, sepse, po ia nënshtroam votimit rast pas rasti, mund të përfshijmë dikë dhe nuk përfshijmë dikë tjetër që ka të njëjtat kushte, apo jo, zoti Rama? Kjo nuk do të ishte në nderin e komisionit dhe të Kushtetutës.

Ulsi Manja – Unë jam i detyruar të zbatoj në këtë moment nenin 8 të ligjit nr. 84/2016 “Për rivlerësimin kalimtar të gjyqtarëve dhe prokurorëve në Republikën e Shqipërisë” dhe

Rregulloren e miratuar në Kuvendin e Shqipërisë, posaçërisht nenin 8, çdo gjë tjetër jashtë ligjit, jashtë këtyre përcaktimeve ligjore nuk mund të hidhet për votim.

Sot jemi në një seancë emër për emër. Secili nga kolegët këtu në komision mund të propozojë çdo lloj emri, qoftë nga lista me 4 vota, qoftë nga lista me 5 vota. Kështu që ka një emër konkret, një propozim konkret nga lista me 39 emra, pra lista me 4 vota nga kolegu Noka. Të vijë edhe zonja Hysi që ta hedhim në votim!

(Ndërprerje incizimi)

Luan Rama- Unë thashë këtë gjë...

Ulsi Manja – Po, zoti Rama.

Luan Rama - ... meqenëse, po flas pak që të relaksoheni ju dy përfaqësuesit Big, si e quajti ai atë, e Big Mekut të Madh.

Flamur Noka –Lëre ti atë, po vazhdo.

Luan Rama – Ideja ime është kjo, për absurditet të ligjit dhe të punës që kanë bërë trupat që i kanë sjellë listat këtu, na rezultoi se në listën e kaluar të miratuar nga Avokati i Popullit dhe të pakontestuar nga ONM-ja ka emra që krijojnë probleme me standardet apo me kriteret, sepse vetë këtu disa prej aplikantëve pruan që kanë lidhje të afërt familjare me persona që janë subjekt i ligjit në fazën e mëtejshme.

Pra, kemi dy standarde për të njëjtën kategori problemi, njerëz me të afërm në sistemin e drejtësisë kanë rekomandim negativ nga ONM-ja për shkak të kësaj shtate, ndërkohë që të tjerë me të njëjtin problem nuk e kanë rekomandimin negativ nga ONM-ja, gjë që më bën mua dhe këtë e them me shumë bindje, të dyshoj në seriozitetin dhe në profesionalizimin e përzgjedhjes që është bërë nga Avokati i Popullit dhe nga përfaqësuesit e ONM-së, të cilët kanë përjashtuar nga kriteri i konfliktit të interesit siç e quajnë ata njerëz, dhe këtë prapë e them me shumë bindje, profesionalisht shumë më të dobët nga ata që kanë penalizuar, gjë që dëshmon prapë për një përzgjedhje korruptive, e them pa asnjë rezervë.

Gjithsesi, ne ligji nuk na jep të drejtën që ata, që ata i kanë kaluar për paaftësinë apo për arsye të tjera subjektive, të mund të mos i përcjellë më tej. Atëherë, për të mos aplikuar ne dy standarde unë propozova që të njëjtët emra, meqenëse unë do të isha për t'i hequr këta të dy apo tre sa janë, por meqë këta nuk i heqim për të respektuar të njëjtin standard që ne të mos rezultojnë me *double standard*, edhe 5 emrat e tjerë që kanë të njëjtin problem formal t'i përfshijmë në listë nëse kjo bëhet me konsensusin e të 6 përfaqësuesve. Në të kundërt unë personalisht jam që ne të mos futemi në votim emër për emër për të mos krijuar probleme, sepse unë personalisht refuzoj të votoj çdo emër tjetër që prek rekomandimet e ONM-së.

Më falni, propozimin e bëj për të korrigjuar problemin që ka krijuar vetë ONM-ja.

Ulsi Manja – Po, zoti Noka.

Flamur Noka – Zoti kryetar, pikërisht këtë që tha zoti Rama, kemi kaq kohë që e kërkojmë, të zbatojmë të njëjtin standard. Në rast se ne, po e përsëris, dhe konstatojmë se kishte kandidatë me kritere identike gjysmën e të cilëve e kishte kualifikuar Avokati i Popullit apo ONM-ja dhe gjysmën e të cilëve nuk e kishte kualifikuar Avokati apo ONM-ja dhe kishin dhënë rekomandime negative, atëherë kërkoj që ne si institucion kushtetues, në funksion dhe zbatim të ligjit, në zbatim të Kushtetutës, të zbatojmë dhe të përdorim një standard dhe vetëm një. Të gjithë ata kandidatë pretendentë që vërtetuan dhe me dokumente dhe me fakte se nuk u janë marrë në konsideratë 1, 2, 3 argumente nga ana e Avokatit të Popullit apo nga ana e ONM-së, dhe i vërtetuan këto me dokumente, t'i shqyrtojmë dhe t'i kalojmë, sepse janë në përputhje me ligjin, pavarësisht gabimeve apo paragjyqimeve që mund të ketë bërë ONM-ja apo Avokati i Popullit. Këtë gjë thotë zoti Rama. Unë e kërkoj pikë për pikë, të biem dakord në mënyrë konsensuale dhe ta votojmë të gjithë, sepse janë njerëz që i plotësojnë edhe këto kriteret. Kaq po kërkoj dhe as më shumë dhe as më pak.

Faleminderit!

Ulsi Manja – Unë bashkohem vetëm në një pikë në atë që tha zoti Rama, që lista e rekomandimeve nga ONM-ja, por edhe lista tjetër, konsensusi, arrihet vetëm nëse votohet, sepse edhe unë nuk jam për të prekur standardet e ONM-së. Pse? Sepse janë persona që bëjnë pjesë të lista e kandidatëve që kanë rekomandime negative dhe vetë Kushtetuta dhe ligji kanë thënë kalojnë me 5 vota, sepse bëhet fjalë për kandidatë që Operacioni Ndërkombëtar i Monitorimit ka dhënë këtë rekomandim. Listën e kandidatëve që kemi përpara, që plotësojnë kriteret formale dhe nuk kanë marrë një rekomandim negativ nga ONM-ja, jemi duke e diskutuar sot dhe këtë e kemi si pikë të parë, sipas nenit 8 për t'ia nënshtruar votimit. Ndërsa, lista e kandidatëve me rekomandime negative nga ONM-ja, nuk mundet asesi që të ketë konsensus. Kjo listë duhet t'i nënshtrohet votimit. Unë bashkohem me atë që thotë zoti Rama, nëse nuk ka dakordësi, nuk jam për ta prekur këtë listë.

Luan Rama – Të bëj një sqarim. Kur thashë konsensus, nuk kisha parasysh përjashtimin e votimit, por thashë marrëveshjen e fjalës, fjala vjen po marr një kot tani: Monika Meçan ne e votojmë të gjashtë, zonjën tjetër Nela Pekën ne e votojmë të gjashtë, në këtë kuptim. Pra, ne votimin do ta bëjmë për ta formalizuar me ligjin, jo konsensus për ta kaluar, por nëse nuk biem dakord kështu, nuk ka sens, e para.

E dyta, zoti Manja, ju lutem mësoni Flamurin dhe më dëgjoni për këtë që jam duke thënë.

Ulsi Manja – Po, zoti Rama.

Luan Rama – Dje gjatë seancave dëgjimore, jam i sigurt edhe pardje, pavarësisht se unë nuk kam qenë, shumica e aplikantëve, e pretendentëve apo e kandidatëve, me shumë etikë dhe profesionalizëm i drejtoreshin këtij komisioni që ky komision të vendosë në integritet të plotë duke shqyrtuar gjithçka realisht që ata ofrojnë, të pandikuar nga rekomandimet apo vlerësimi paraprak që është bërë nga Avokati i Popullit apo nga ONM-ja, sepse ata besojnë me të drejtë në atributin kushtetues që ka komisioni për të marrë vendim dhe në legjitimitetin e vendimmarrjes që kemi ne, sepse në fund të fundit, ky është një trup apelimi dhe nëse ishte gabim që u pranuan të intervistohen ata, të cilët e kanë fituar (po e thjeshtësoj) gjyqin në shkallë të parë, (sepse këtë logjikë parashikon ligji dhe ne bëme për të krijuar një përfytyrim më të qartë), pjesa tjetër apelojnë këtu për t'u dhënë një të drejtë që u është mohuar. Ne jemi të bindur sepse një pjese të këtyre u është mohuar kjo e drejtë. Pra, në këtë kuptim e shtroj unë idenë e konsensusit, të cilën natyrisht e përkthej në 6 vota për secilin emër që kalon.

Ulsi Manja - Po, zoti Noka.

Flamur Noka – Zoti kryetar, ne nuk kemi kërkuar asnjëherë që ti të shkelësh ligjin dhe Kushtetutën, ndaj mos u kapni pas ligjit dhe Kushtetutës.

ONM-ja na ka sugjeruar dhe nuk na jep vendime, sepse, siç e dini, ne jemi institucion kushtetues. Nëse ne nuk do të diskutonim asnjë nga sugjerimet apo kandidaturat e ONM-së, atëherë pse po mbledhemi ne? Kështu do të funksiononin vetëm dy komisionet e tjera dhe nuk do të ishte e nevojshme fare që të mbledheshim ne, sepse do t'u shkonte lista e pastër dy komisioneve të tjera, pa pasur nevojë për ne. Pra, ne jemi institucion kushtetues, që na ka krijuar Kuvendi për këtë qëllim, që të dëgjojmë të gjithë kandidatët dhe pretendentët për ankesat, problematikat dhe pretendimet e tyre.

Ne i dëgjuam dhe tani do të fillojmë votimin. Pra, mos thuaj se po të detyron kush, sepse nuk po të detyron askush. Ne i dëgjuam kandidatët dhe të gjithë jemi dëshmitarë kur dje ramë dakord se kishte shumë pretendentë që e kishin të dokumentuar faktin që u është anashkaluar kriteri, sepse ata i zbatojnë kriteret, ndaj ejani ta hedhim në votim.

Ulsi Manja – Në votim do t'i hedhim sipas propozimeve që ju do të bëni. Fillojmë votimin me listën e kandidatëve që nuk plotësojnë kriteret dhe nuk kanë rekomandime nga ONM-j me 4 vota.

Propozimi i parë është për zotin Vasil Shandro.

Kush është dakord me propozimin e zotit Noka për shtetasin Vasil Shandro? Pro? Kundër? Abstenim

3 pro. 3 kundër. Asnjë abstenim.

Rrëzohet.

Kush nga kolegët ka propozime të tjera nga lista e kandidatëve?

Flamur Noka – Rezarta Shutz, me të cilën u dashurua zonja Vasilika. Tani do ta shikojmë se si do ta shfaqë dashurinë Vasilika.

Oerd Bylykbashi - Motivi është shumë i thjeshtë, eksperiencë e konsiderueshme, asnjë nga ne nuk e njeh, sepse ajo ka zhvilluar profesionin e saj jashtë Shqipërisë me ndërkombëtarët. Ajo ka shumë vlerë, sepse nuk duhen përjashtuar kualitete të tilla. Ne e bëmë propozimin formal në këtë histori.

Flamur Noka – Të jemi të qartë, ajo kishte një begraund profesional për t'u admiruar, nga të rrallat, dhe ishte skulifikuar. Vasilika shprehu një dashuri të madhe për profilin e saj të lartë profesional, ndaj do ta shikojmë nëse ajo ka vendim politik për ta rrëzuar apo do t'i qëndrojë vendimit profesional për CV-në e saj.

Ulsi Manja- Po pse e paragjykoni?!

Hedhim në votim emrin e zonjës Rezarta Shutz. Kush është dakord me propozimin e kolegut Bylykbaqshi?

4 vota pro. Abstenon zoti Rama...

Oerd Bylykbashi – Këtu jemi para selektivitetit të pastër. Kishim një kandidat, i cili jashtë kushteve ...

Ulsi Manja – Këtu po i tejkaloni kufijtë.

Oerd Bylykbashi – Një sekondë, kjo të ngelet këtu dhe ta lexojnë të gjithë kandidatët, edhe ata që skulifikohen, edhe ata që kualifikohen.

Ulsi Manja – Të lutem, a mund ta shpall rezultatin e votimit, dhe më pas bëjeni komentin!

4 vota pro. 1 kundër. 1 abstenim. Abstenon zoti Rama.

Zonja Rezarta Shutz kalon dhe bëhet pjesë e listës së komisioneve të tjera.

Oerd Bylykbashi – Ky është selektivitet i pastër politik.

Vasilika Hysi – Tani po talleni ju?!

Oerd Bylykbashi – Jo, nuk po tallem, sepse kjo është tallje me këtë komision.

Ulsi Manja – A keni propozime të tjera?

(Diskutime pa mikrofon.)

Oerd Bylykbashi – Ky është selektivitet i pastër politik. Unë nuk e njoh fare atë zonjë...

Ulsi Manja – Po ku qëndron selektiviteti politik kur ti e propozove vetë? Ajo mori 4 vota dhe na qenka selektivitet politik?!

Oerd Bylykbashi - Unë nuk kam asnjë argument pse zoti Vasil Shandro duhej të skulifikohej.

Ulsi Manja – Po kjo është çështje votimi.

Oerd Bylykbashi - Vota është selektive, që unë dua të vendos këtë dhe nuk dua të vendos atë tjetrin, për të njëjtat kushte.

(Diskutime pa mikrofon.)

Ulsi Manja – Ju lutem kolegë, a ka propozime për emra të tjerë nga kjo listë?

Flamur Noka – Nuk ka.

Atëherë, sipas procedurës, kalojmë te lista tjetër. Pra, nga lista e kandidatëve që nuk plotësojnë kriteret dhe nuk kanë marrë rekomandim nga ONM-ja me 4 vota u hodhën në votim 2 emra, zoti Vasil Shandrio, i cili nuk kalon dhe zonja Rezarta Shutz, e cila me 4 vota pro, 1 kundër dhe 1 abstenim bëhet pjesë e listës që do t'u përcillet komisioneve të tjera.

Vazhdojmë me listën e kandidatëve që plotësojnë kriteret formale dhe kanë marrë rekomandim negativ nga ONM-ja.

Votimi është i vlefshëm kur kandidati në këtë votim merr 5 vota. Pra, vetëm nëse kandidati merr 5 vota ai bëhet pjesë e listës që do t'ju përcjell dy komisioneve të tjera.

Luan Rama – Me leje!

Ulsi Manja – Po, zoti Rama.

Luan Rama – Zoti kryetar, për emrat që diskutuam më parë, insistoj edhe një herë dhe ftoj kolegët t'i kalojmë me 6 vota, nëse biem dakord. Në të kundërt, nuk ka arsye të ...

(Ndërhyrje pa mikrofon.)

Po kërkoj të ngrihem pak mbi nivelin e ...

(Ndërhyrje pa mikrofon.)

Ulsi Manja – Edhe me 5 vota është i vlefshëm votimi.

Luan Rama – I vlefshëm është.

Unë kërkoj ta bëjmë këtë gjë me kompromis.

(Ndërhyrje pa mikrofon.)

Ju me kompromis fituat gjysmën e qeverisë.

(Ndërhyrje pa mikrofon.)

(Mungesë incizimi.)

Ulsi Manja – Ka propozime konkrete nga lista e kandidatëve që plotësojnë kriteret dhe kanë rekomandime nga ONM-ja?

(Ndërhyrje pa mikrofon.)

Urdhëro listën!

Flamur Noka – Do ta konsiderosh propozimin e zotit Rama?

Ulsi Manja – Vetëm votimin nominal.

Vasilika Hysi – Bëhet veç e veç.

Luan Rama – Unë e di, por nëse biem të gjithë dakord, t'i votojmë të gjithë veç e veç me 6 vota.

Ulsi Manja – Zoti Rama, secili emër do të hidhet në votim veç e veç, siç e ka ligji.

Luan Rama – Po, veç e veç po them edhe unë, por të biem dakord...

(Mungesë incizimi.)

Flamur Noka - Unë kam një propozim.

Ulsi Manja – Po, zoti Noka.

Flamur Noka – Për sa kohë që në listën e sjellë nga Avokati i Popullit dhe ONM-ja ka emra që kanë konflikt të pastër interesi dhe nuk i kanë skualifikuar, për shembull, të kualifikojmë edhe zonjën Nela Peka, e cila është rast identik si tre të tjerët që janë në konflikt interesi.

Ulsi Manja – Pra, me propozim të kolegut Noka, hidhet në votim emri i kandidates Nela Peka për t'u bërë pjesë e listës që do t'u përcillet dy komisioneve të tjera.

Votimi është i vlefshëm me 5 vota pro.

Kush është dakord me propozimin e zotit Noka? 4 pro. 1 kundër. 1 abstenim.

Nuk miratohet.

Ka propozim tjetër?

(Mungesë incizimi.)

Oerd Bylykbashi - Ta lexojnë edhe ata që do të shikojnë punën tonë. Ne sapo rrëzuam një kandidate, e cila refuzon se është në konflikt interesi. Në çdo rast të thotë se ligji e ka mekanizmin e shmangies së interesit, pranon para komisionit në mirëbesim se është në marrëdhënie familjare me një nga subjektet e ligjit, por ne tani e rrëzuam.

Si kjo, kemi të paktën edhe dy-tri raste të tjera, që ne nuk mund t'i votojmë dot, sepse me këtë votim do të thotë se po të pranojmë dikë tjetër, kemi shkelur parimin bazë, por më e rëndë është se në listën e atyre që përfshihen drejtpërdrejt në komisionin tjetër, ka persona në të njëjtat kushte. Kjo do të thotë se po përjashtojmë disa që kanë marrëdhënie familjare me persona subjekt të ligjit dhe kemi përfshirë për votim disa, të cilët po ashtu kanë marrëdhënie familjare.

Mekanizmi, zonja Hysi, nuk i përzgjedh, sepse mund të ketë shumë arsye të tjera pse dikush përzgjidhet ose jo, por kriteri bazë për t'u përfshirë duhet të jetë njësoj për të gjithë për të pasur një të drejtë për t'u votuar atje.

Ulsi Manja – Po, zonja Hysi.

Vasilika Hysi – Faleminderit!

E kuptoj që sot e keni nisur mbledhjen duke më cituar vazhdimisht mua, ndërkohë, unë po ju citoj ligjin dhe Rregulloren.

Nëse në nenin 8 të Rregullores thuhet se një person, i cili ka një vlerësim, rekomandim negativ nga ONM-ja, kërkohet të kalojë me propozim të një anëtar ...

(Ndërhyrje pa mikrofon.)

Flamur Noka – Ne i kemi lexuar të gjitha ato. Pse na i citoni ne? Mos të dukemi ne si avokatët e këpucëve?

Vasilika Hysi – Zoti Noka ...

Flamur Noka – Moj zonjë, mos na i lexo, se i dimë! Mos na ha kohën kot!

Vasilika Hysi – Më fal! Zoti Noka, ju lutem! Nuk keni të drejtë të komentoni votën e askujt.

Ulsi Manja – Vazhdoni, zonja Hysi!

Vasilika Hysi – Nuk keni të drejtë të komentoni votën e askujt. Ne jemi të barabartë dhe secili...

Flamur Noka – Nuk ke të drejtë të lexosh ligjin, se ligjin e lexoj dhe e njoh vetë unë, nuk ka nevojë të ma lexosh ti! Se ke ngelur vetëm duke lexuar. Lëre leximin dhe fol me mendjen tënde!

Ulsi Manja – Të lutem! Zoti Noka, mëni ta mbarojë!

Vasilika Hysi – Unë jam juriste dhe ligjin do të referoj.

Flamur Noka – Po flit me mendjen tënde, jo me të lexuar.

Vasilika Hysi – Mendja ime është ligj.

Flamur Noka – Mendja jote, partizan në mal.

Vasilika Hysi - Prandaj, nëse doni kandidatë të tjerë nga kjo lista me rekomandim e ONM-së, me 5 vota... Nuk keni të drejtë të komentoni, votojmë apo nuk votojmë, pro, kundër, apo abstenim.

Flamur Noka – Integriteti profesional është zero, zonjë, me këto votime që po bën ti. Më vjen keq që po ta them! Kam pasur konsideratë, në aspektin njerëzor vazhdoj të ruaj konsideratën maksimale, në aspektin profesional vazhdoj të kem dyshime të mëdha me këtë votim që bëre.

Zonja Vasilika, përderisa ti nuk respekton standardet, është shumë e thjeshtë, që ju keni në konsideratë subjektivitetin politik.

Ligji ka parime dhe standarde, se e dëgjova dhe atë që: “ti zbaton ligjin”. Po ligji është parim dhe standard. Si qenka kjo?! Ti po e bën subjektivitet në tërësi dhe selektivitet politik në

rastin konkret. Edhe në rastin e votimeve e tregove një gjë të tillë. Edhe në prishjen e konsensusit e tregove një gjë të tillë.

Oerd Bylykbashi – Ajo që unë nuk kuptoj është se si proceduralisht ju do të çoni me 3 vota. Pra, do të hartoni dhe do të dërgoni me 3 vota...

(Ndërhyrje pa mikrofon)

Jo, jo, ne nuk jemi postierë. Jemi komision që veprojmë me vendim dhe se si ju do ta çoni këtë. Jam shumë kurioz se çfarë do të shkruani në raport.

Faleminderit!

Vasilika Hysi – Atëherë, Kryetar, këtu thuhet...

(Ndërhyrje pa mikrofon)

Ju lutem!

Ulsi Manja – Po, zonja Hysi.

Vasilika Hysi – “...Brenda 10 ditëve nga krijimi, Komisioni ad hoc i përcjell listën e hartuar sipas pikës 4, komisionit ad hoc përzgjedhës. Dy listat e tjera nuk përzgjidhen”

(Diskutime pa mikrofon)

(Mungesë regjistrimi)

(Diskutime pa mikrofon)

(Mungesë regjistrimi)

Ulsi Manja – Në përfundim të procesit të votimit, sipas nenit 8...

(Diskutime pa mikrofon)

... sipas vendimit nr. 40, të vitit 2017 “Për procedurat parlamentare për funksionimin e komisioneve ad hoc dhe realizimin e procesit të votimit”, sipas ligjit nr. 84, viti 2016 “Për rivlerësimin kalimtar të gjyqtarëve dhe të prokurorëve në Republikën e Shqipërisë”, neni 8, pika 5, Komisioni përcjell për përzgjedhje listën e kandidatëve duke iu shtuar kësaj liste edhe zonja Rezarta Shuts.

Pra, sekretaria teknike e komisionit të bëjë zbardhjen e procesverbalit dhe t’ua përcjellë listën 2 komisioneve të tjera përzgjedhëse. Kjo është e vetmja listë e kandidatëve që do t’u përcillet komisioneve ad hoc për votim. Pra, një listë e vetme e integruar së bashku me një emër.

Këtu mbyllet mbledhja.

Faleminderit!

MBYLLET MBLEDHJA